

O Dek

O dek! Enn serindikap ek enn kardinal

Pe kourtize lor enn brans filao.

O dek! Troi ti lapin blan ar zot lizie rouz

Pe zoue-zoue lor lerb ver dan bor dilo.

O dek! Kat tipti pousin blan, noir, zonn, maron

Ansam pe fouy later pou rod lever.

Bat to tanbour tanbourye!

Tap to ravann ravannye!

Les lapo kabri gazouye!

O dek! Enn bengali pe sante lor enn fler,

Ki leze kouma enn papyon dore.

O dek! Fler kann velour pe danse dan lezer,

Li pe valse ar lamizik lesiel.

O dek! Zoizo kolorye gazouy-gazouye

Pe patine lor ledo larkansiel.

Bat to tanbour tanbourye!

Tap to ravann ravannye!

Les lapo kabri gazouye!

O dek! Niaz pe anvlop montagn ar so kares,
So lonbraz pe rafresi tou bann fler.
O dek! Enn boul dife lor pe al boir dilo,
So kouler pe pintir nou liniver.
O dek! Lalinn kouler larzan pe zoue yoyo
Ar bann zetoil diaman lao-lao.

Bat to tanbour tanbourye!
Tap to ravann ravannye!
Les lapo kabri gazouye!